

CRISE CORONAVIRUS

O tráfico na AP-9 redúcese á quinta parte o domingo, tras as medidas do Goberno



Paneis informativos de Autopistas del Atlántico e DGT recomendando o pago automático.

- **Autopistas del Atlántico mantén ao 100% da plantilla para garantir a fluidez**
- **A infraestrutura recomenda o pagamento telemático para previr contaxios**

16.03.2020. O tráfico na Autoestrada do Atlántico (AP-9, Tui-Ferrol, 219,6 kilómetros) reduciuse onte á quinta parte, no primeiro domingo de aplicación das medidas do Goberno de España contra o contaxio do coronavirus. A AP-9 registrou 3.743 vehículos de intensidade media diaria (IMD) o 15 de marzo, fronte aos 18.374 vehículos de media no que vai de 2020. A redución con respecto á mesma data de 2019 foi dun 73,24%.

A redución do tráfico está a ser semellante nas autoestradas Puxeiros-Baiona (AG-57) e A Coruña-Carballo (AG-55), de titularidade autonómica e tamén

xestionadas polo grupo Itínere en Galicia. A AG-57 rexistrou este domingo 1.310 vehículos (IMD), cinco veces menos que a súa media anual de 6.556 vehículos e un 73% menos que o mesmo día do ano anterior. A AG-55 rexistrou 2.763 vehículos, 4,5 veces menos que a súa media anual (12.571 de IMD) e un 70,42% menos que na mesma data de 2019.

250 profesionais manteñen a AP-9

Autopistas del Atlántico mantén dende o venres 13 de marzo todos os sistemas de pagamento automático e recomenda a todos os condutores que realicen o abono por medios telemáticos (telepeaxe ou tarxeta bancaria) para evitar o contacto co diñeiro en efectivo e previr os contaxios.

A empresa concesionaria vén de retirar, por prevención, todo o persoal das cabinas de cobro, establece as vías automática e dinámica como formas de pagamento preferente nas peaxes e mantén a presenza de persoal de apoio para asistir aos condutores no caso de necesitalo. Audasa tamén vén de reforzar os servizos de atención ao cliente, atención a incidencias e desinfección dos dispositivos de pagamento de contacto manual para os clientes, servizos para os que conta con 250 profesionais.